

Inyarubha ya Paauru kwa Tiitũ Ubukangati

Inyarubha yinũ yandikirwi nu umutumwa Paauru. Hanũ aari akiiri kwandika inyarubha yinũ, Paauru aari arahocha emeremo ja Mungu hamwimwi na Tiitũ mwiginga rya Kireete. Akumara akarwiyũ, akamara sikũ suuhu, akamwandikira Tiitũ inyarubha yinũ kumaswaja guusi iguru wu ukwimirira abhiisirirya Kireete iyo.

Munyarubha yinũ, Paauru akaha Tiitũ emeremo jo okorobhora abhiimiririri bha risengerero. Kwiki akamwisasaama kubhakong'ya abhiisirirya bha Kireete, ku kubha bhaareho abhiija bha ururimi. Paauru areerekeererya Tiitũ iguru wu ukukangata amaribhita mwisengerero, abhakaruka, abhakari, abhamura na bhambũsa. Mutinirũ, arahiitya Tiitũ kubha, Abhakiriisitũ bhũsi bhiikari kwa morembe na koro nzirũ na bhatabha bhaatũ bha kwũmana na kwiyaahũra amaribhita.

Amakeeren'ya

¹ Inyarubha yinũ nandikiri inyĩ Paauru, omo-hocha wa Mungu, nu umutumwa* wa Yĩsu Kiri-sitũ. Nitumirwi iguru wu ukwerekeererya abhaatũ bhanũ bharubhwirwi na Mungu, korereke

* **1:1 Umutumwa.** Kumaragirira bhukang'u, rora ring'ana abha-tumwa muKiniibhasa.

bhabhone ukumwisirirya nu ukwobhoora amaheene. Amaheene gayo garabhakangata ku ukwikara chimbu Mungu akwenda,

² na amaheene garabhaha ubhwisigi bhwu ubhuhuru bhwa kemerano. Mungu akaragan'ya ubhuhuru bhuyo icharu kikiiri koteemwa, neewe atakutara kugamba rurimi.

³ Nangu, ni-ribhaga rinu Mungu indiri kwerecha habhwiru ing'ana yaazi Inzamu. Ni-kwa riswajarya Mungu Umusabhuri witu kubha, nihirwi emeremo ju ukaragan'ya ing'ana yiyo.

⁴ Nirakwandikira awi Tiita, umwana waani wa amaheene mubhwisirirya bhanu tukugwatana hamwimwi.

Ibhigungi no omorembe kurwa kwa Bhaabha Mungu, na kwa Yisu Kiriisitu Umusabhuri witu, bhibhi na naawi.

Emeremo ja Tiita mwiginga rya Kireete

⁵ Hanu naruuri Kireete iyo, nikakutiga awi korereke uturi bhwaheene amang'ana agandiganu gasaagiri, hamwimwi na korobhora abhiimiriri bha risengerero muzimbiri zusi, chimbu nakwirikiriiri.

⁶ Umwimiiririri wa risengerero, areenderwa kubha umutu wanu ataana isoro. Abhi nu umakari wumwi, abhaana bhaazi bhabhi abhiisirirya, bhatabha bhasigu hamwi bhanu bhatakwigwa.

⁷ Umwimiiririri wa risengerero, ni-mwangariri, areenderwa kubha umutu wanu ataana isoro, ku kubha agwatiibhwi emeremo ja Mungu. Atabha umutu wi ikitwi, atabha mwangu

wa kwigatana, atabha munywi, atabha mwumani na atabha musigi wa mpirya.

⁸ Nawe abhi mwerya wa koro, musigi wa amazumu, we ekerengo, we eheene, umurindu, wu kwiyiimirira.

⁹ Abhi aragwata bhwaheene ing'ana ya amaheene, chimbu igiibhwi. Hayo neho akutura kunaja abhaatu kumija ga amaheene, na kubharecha bhanu bhakwanga amija gayo.

¹⁰ Nirakubhurirabhu ku kubha Kireete bhareho abhaatu bhaaru bhatamakwigwa, bharagamba amang'ana gataana bhweru, na ni-bhakangirira, kinda bhanu bharuriiri manyangi ya Abhayaahudi. Abhaatu bhayo bharikibhwi kwija,

¹¹ na bhararimira abhaatu mumiji myaru. Bharija amang'ana ganu gatakwenderwa, korereke bhabhone zimpira kubhwindi bhabhi.

¹² Ikari kwari nu umurutiriri wumwi, Mukireete wi iwaabhu, wunu aagambiri, "Abhakireete, ni-bhabhihi siku zusi, bhaangi ibhityinyi ibhibhi, bhanamba, bhatubhu."

¹³ Ubhaminyikiriri bhuyo ni-maheene. Iguru wa riyo, ubhi urabharecha kwa bhuhaari abhaatu bhayo, korereke bhagwati amija ga amaheene.

¹⁴ Bhatigi kwitegeerera amaganu gi ikiyaahudi ganu gataana bhweru, na amaswaja ga abhaatu bhanu bhatigiri amaheene.

¹⁵ Kubhaatu bhu umwuyu umwiru mubhutangi bhwa Mungu, ebhegero bhyusi bhibhinguikiibhwi. Nawe, kubhaatu abhabhuruuru na abhatiisirira, ebhegero bhyusi ni-bhubhuruuru, ku kubha

amiisiigi gaabhu ne ekoro yaabhu, bhyizwiri ubhubhuruu.

¹⁶ Bharabhuga abheene kubha bhamwizi Mungu, nawe amahocha gaabhu gareereken'ya kubha bharamwanga. Bhayo nebho bhakubhihirirwa, abhaangi, bhatakwenderwa kwing'ana ryaryasi izamu.

2

Amiija ga amaheene

¹ Nangu Tiitu awi, ubhi urijja abhaatu kuring'aana na amiija ga amaheene.

² Bhabhauriri abhakaruka, bhareenderwa kubha bhe ekerengo, bhasuuku na bha teemwa nzamu. Naatu bhabhi bhaheene bhu ubhwisirirya, kubhasiigi na kubhwigumirirya.

³ Muyomuyo ubhabhauriri abhakikuru kubha, bhabhi ne eteemwa yinu ikumukumya Mungu. Bhatamba bhagubhi bha abhaatu, bhatamba bhanywi, nawe bhareenderwa kwija ubhwikari ubhazumu,

⁴ korereke bhabhi bhariija abhaacha kubhasiiga abhasubhi bhaabhu na abhaana bhaabhu.

⁵ Naatu abhaacha, bhabhi ne ekerengo, bhabhi bharonge, bhakore bhwaheene emeremo mumiji jabhu, bhabhi abhaatu abhazumu na bhu ukusuka abhasubhi bhaabhu. Ubhabhauriri bhakorebhu, korereke ing'ana ya Mungu itaregwa.

⁶ Na abhamura, ubhareche bhabhi bhe ekerengo.

⁷ Na naawi, mamang'ana guusi, ubhi ekerenjo chu ukwigwa kwabhu, ko kokora amazumu. Mumija gaazu, wereken'ye amaheene nu ubhunagu.

8 Wiji amija ga amaheene korereke amija gataririirwa na abhaatu. Nuru umutu areenda kugaanga, asuki, ku kubha atakubha ni ing'ana rya kutugamba kibhi.

9 Ubhabhuriri bhambusa, kubha bhasuki abhaku bhaabha, bhabhazomere kwa guusi, bhatahakaana nabha.

10 Naatu bhatiibha, nawe bhabhi bhaheene, korereke amahocha gaabha guusi gakore abhandi bharutwi na amija ga Mungu Umusabhuri witu.

11 Ubhi urija amang'ana gayo, ku kubha Mungu irikiin'yi ibhigangi bhyazi, ko koreeta ubhutuurya kubhaatu bhasi.

12 Urubhangu ruyo, ruratwija kwanga ubhabhi nu umwuyu gwa kusi. Kwibhu hanu tukubha tukiri kusi yinu, tubhi bhe ekerengo, bhe eheene, na abhaatu bhanu bhakwikara ubhwikari bhu ukumukumya Mungu.

13 Twikaribhu, inu turiisega urusiku rurya uruzamu rwu ukugaruka kwa Yisu Kiriisitu. Urusiku ruyo ararorekana mubhuku bhwazi. Ewe newe Mungu Umuku na ni-Musabhuri witu.

14 Akiihurucha iguru witu, korereke atusabhuri kurwa mubhabhi bhwasi. Akeenda kutwera, korereke tubhi abhaatu bhaazi, bhanu bhanu umucha kokora amazumu.

15 Mmbe nangu, ubhi urija amang'ana gayo guusi. Uhirwi ubhunaja bhwasi bhwu ukuhaara no okorecha abhaatu. Utaregwa na muti wawusi wurya.

3

Okokora amazumu

¹ Ubhi urahiitya abhaatu kubha, bhasuuki na kwigwa abhakangati na bhu ubhunaja. Bhiisiriryi kokora amang'ana amazumu guusi.

² Ubhabhuriri bhatatuka muti wuwusi, bhatamba bhumani, bhabhi bhanyuhu na bhasuuku kubhaatu buusi.

³ Nuru itwi itubheene, ikari hanu twari tukiri kumwisirirya Yisu, twari bhageege, bhaangi na tukakangiribhwa. Twari bhambusa bhi inamba yo okokora amabhi na zeteemwa zuzusi za kuusi. Ubhwikari bhwitu bhwari bhwu ubhubhi na rihari. Abhaatu bhakatwigatanira itwusi tukabhabhihirirwa.

⁴ Nawe Mungu, Umusabhuri witu, akatwerecha ubhuzumu nu ubhusiigi bhwazi, akatusabhura.

⁵ Ataatusabhwiri ku kubha ya amahocha gitu amazumu, nawe ku kubha yi ibhigungi bhyazi. Atubhingukiryi ubhubhi bhwitu, kukwibhurwa bhuhya nu ukubha nu ubhwikari ubhuhya kunzira ye Ekoru Indindu.*

⁶ Mungu akatwitirira ekoru yaazi kwa bhwari, kuhitira Yisu Kiriisitu, Umusabhuri witu.

⁷ Akakorabhu, na kutubharira kubha bhe eheene kunzira yi ibhigungi bhyazi, korereke tobhone kugabha ubhuhuru bhwa kemerano, chimbu ubhwisigi bhwitu bhari.

⁸ Amang'ana gayo, ni-ga amaheene. Nereenda awi ugakandikiji, korereke buusi bhanu bhamwisiriryi Mungu, bhagagwati na kwikong'eererya kokora amazumu. Amang'ana gayo ni-mazumu, na ganu ubhwera kubhaatu buusi.

* **3:5 Ekoru Indindu.** Kumaragirira bhukang'u, rora ikiniibhasa.

⁹ Hamwimwi na gayo, utaani na zihaka ze ekegeege, zikiriri za amariina ga bhasukuru, iryamana na zihaka iguru wi imigiru ja Musa. Gayo guusi gataana bhwerabhwabhwasi.

¹⁰ Umuntu wunu akusiigirirya abhaatu, omoreche rwe embere na rwa kabhiri. Ariibhi atakwigwa, umwangi.

¹¹ Uramenya kubha umuntu ncha wuyo atigiri amaheene, ahaakora ubhubhi, itiniiri umwene.

Amang'ana gukura

¹² Nindiri niji kwikara murubhiri rwa Nikupuri, ribhaga rye embeho. Nawe niramutuma Aritima hamwi Tikiku iwaaazu. Ariihiki iwaaazu, awi wanguhi kuuza Nikupuri turumani.

¹³ Ikong'eererya kusakirya Zeena, umukaari wurya wi imigiru, na Apooro. Ubhahi bhyasi bhyu ukubhasakirya munzira, bhatasuuhirwa kegero.

¹⁴ Abhiisirirya abhakindichitu bhusi, bhigi kwikong'eererya kokora amazumu, korereke bhasakiryi bhu ubhwindi bhwa amaheene. Bhareekorebhu, ubhwikari bhwabhu bhutakubha bhaha.

¹⁵ Abhaatu bhusi bhanu bhari hamwimwi na niinyi hanu, bharakokeerya. Nangu awusi, ubhakeerye abhiisirirya abhasigwa bhusi.

Ibhigangi bhya Mungu bhibihi hamwimwi na niimwi.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553